

fert'g brängst, su eene gebts ne mieh, Du mußt o amol oan Dich denken, Du schindst'ch ja zu Tude, Motter, Du best doa zu gutt!" Oder wenn se woas versahn hot und eß außer'ch: „nu woas eß denn do weiter, doas koann mer o poassir'n.“ Un wenn'r ihr nu goar a mol anne Freede macht, un 'r woas metbrängt, oder se wumet hinnahmt, do fillt'r sahn, wie sie oich uff'n Händ'n trät un fer oich dorchs Foier gieht, do hot'r n Himmel uff Ard'n, un in oihrn Hause eß wie in Goarten Gutes. Doas merkt'ch! Fer de Saufause un Schpieler hoa'ch doas ne gesoit, fer die gehiert'ch keene Frau, un wenn die an Hausdeifel hoan, do geschieht'n rajcht, die hon's ne basser verdient. War ader jenner Frau groade Dalles zun Pussen thut, dar eß selber a Deisl.

Rbt.

Fer de Weiber o woas.

Uff de Manner haden de Weiber goar su garne, as wenn doas lauter Unflothe wär'n. Worömch se do da Genen genumm'n hoan? Ja se hoanchs ne su gedocht, soin se. Nu freilich, Engel sein se ne oalle, ader de Weibsen o ne, un wenn die andersch wär'n, do säht's in moanchen Hause o andersch aus. Zuärscht do losen se dan Mannern no, doas Moancher sene schon soatt hot, ih erschch se nimmt, weil er wees: s eß nischt oan er. Hot ader Eener sich wärlch Gene aus Liebe genumm'n, do macht se su lange, bes arch soit: Du mußt a Brat vern Koppe gehot hoan, doas Dich in die vergoafft host. Aerscht soite se nor eemmer „Zimmt,“ un schmärt'n Syrop öms Maul röm, ader nu thelt se nischt as Pfaffer aus met ihrer Zunge un macht'n ganzen Dak a Gesichte wie a Essgtopp. Aerscht ging se eemmer geschniegelt un gebiegelt, un nu lest se in Hause röm, wie o gehoster¹⁾ Täuberch. Aerscht hot se gethon, as wenn se de Walt einreiß'n wällte, un se derheme wingstens zwä Made mieh wärd'n hab'n missen, wenn se furt wäre, un nu steckt se de Beene ungeru Tisch, oder stieht, wu se stieht, oder leest'n ganzen Dak uff Kloatschens²⁾ röm. Will arch n Suuntg a noiwoaschen Hemde oanziehn, do fährt'r met'n Fingern dorch

¹⁾ ein Täuberich mit befiederten Beinen. ²⁾ läuft den ganzen Tag herum, um zu klatschen.